




PLANSTRATEGI
FEDJE KOMMUNE
2020 - 2024

Innhald

1. Målet med kommunal planstrategi.....	3
2. 2. Kommunen sitt plansystem.....	3
3. Utviklingstrekk og utfordringar	5
4. Vurdering av planbehovet.....	5
Kommuneplanen.....	5
Prioriterte planar.....	5
Planar og utgreiingar forankra i lov, forskrift og avtale	7
5. Vedlegg.....	8
Vedlegg I: Lovheimel for kommunal planstrategi	8


1. Målet med kommunal planstrategi

Etter plan- og bygningslova (pbl) § 10-1 er det eit krav at kommunane i kvar valperiode (kvart fjerde år) utformar ein planstrategi. Planstrategien skal vera utarbeida og vedtatt seinast eitt år etter at nytt kommunestyre er sett. Målet med planstrategien er å avklara kva planoppgåver kommunen skal prioritera i valperioden. Prioriteringane vert gjort for å møte utfordringar og venta utvikling i samfunnet og kommuneorganisasjonen. Prioriteringane vil også vera eit uttrykk for kva samfunn me ønskjer oss. Planstrategien gir oss ei moglegheit til å sikra heilskap i planlegginga og ei sterkare politisk styring av det kommunale planarbeidet.

I planstrategien inngår også ei vurdering av om gjeldande kommuneplan er tilfredsstillande, eller om heile eller delar (arealdelen eller samfunnsdelen) må gjennom ei rulling. Kommunen kan ta stilling til om det er behov for utarbeiding av nye arealplanar eller om dagens planar bør verte revidert eller oppheva. Den endelege planstrategien er ikkje ein plan, men skal vere retningsgivande for planlegginga til kommunen og sikra eit heilskapleg planverk. Nasjonale og regionale forventningar, føringar og planar spelar også inn, og slik skal samanhengen sikrast frå topp til botn i planhierarkiet.

2. Kommunen sitt plansystem

Grunnpilaren i Fedje kommune sitt plansystem er kommuneplanen. Den består av ein arealdel og ein samfunnsdel og er det overordna planverket som andre planar skal forankrast i. Samstundes er det naudsynt at kommuneplanen sjølv er forankra i gjeldande lovverk og tek omsyn til nasjonale og regionale føringar og mål. Samfunnsdelen tek for seg utviklingstrekk og utfordringar i samfunnet og presenterer mål og strategiar for den framtidige utviklinga. Arealdelen med tilhøyrande føresegn seier kva type arealbruk som gjeld i ulike delar av kommunen. Ved utbygging krev somme område og tiltak ein *områdeplan* eller *reguleringsplan*. *Kommunedelplanar* tek føre seg ulike tema, til dømes idrett og friluftsliv, eller kulturminne. På somme område er det behov for endå meir spesifikke planar. Me snakkar då om tema og sektor- eller fagplanar. Døme på dette er *trafikksikringsplan*, *beredskapsplan for vassverket*, *ruspolitisk handlingsplan*, med meir. Alle planar skal forankrast oppover i det kommunale planhierarkiet, kor kommuneplanen tronar på toppen. Tiltak frå dei ulike planane må inn i budsjettet. Økonomiplanen er fireårig og tek for seg dei store linene i inntekter, drift og investering, medan årsbudsjettet er meir konkret.



Figur 1: Det kommunale plansystemet.

Interkommunale plansamarbeid er òg ein del av kommunekvardagen. I småkommunar som Fedje er det vanleg å delta i interkommunale samarbeid for nokre av dei lovpålagte tenestene. Helsetenester og renovasjon er døme på dette.

3. Utviklingstrekk og utfordringar

Etter §10-1 (om kommunal planstrategi) i plan- og bygningslova (2008) *bør* planstrategien omfatta «*ei drøfting av kommunen sine strategiske val knytt til samfunnsutvikling, herunder langsiktig arealbruk, miljøutfordringar, verksemda til sektorane og ei vurdering av planbehovet til kommunen i valperioden*». For planperioden 2021-2024 ser me eit behov for å rullera samfunnsdelen til kommuneplanen. Det vil difor vera naturleg å ta denne drøftinga i denne samanheng. I tillegg vil me utarbeida planar for store sektorar i kommunen, der utvikling og utfordringar for dei relevante samfunnsområda bør drøftast. Overordna myndigheiter ønskjer at mellom anna klimatilpassing, utfordringar innan kultur og idrett og planlegging av sjøareal vert drøfta. Meir om overordna føringar finn du i vedlegg II til planstrategien.

4. Vurdering av planbehovet

Kommuneplanen

Samfunnsdelen til kommuneplanen

Rullering av samfunnsdelen må sjåast i samanheng med andre større planoppgåver i planperioden. Me vurderer det som tenleg å utarbeida mellom anna Helse- og omsorgsplanen før me går laus på rulleringa av samfunnsdelen. Då har me høve til å gå djupare inn i sentrale problemstillingar og skaffa oss eit betre grunnlag for å utforma overordna mål og strategiar i samfunnsdelen.

Arealdelen til kommuneplanen

Gjeldande kommuneplan vart vedtatt 15. mars 2013. Merknadar som grunneigarar kom med under høyringsrunden vart ikkje tatt til følgje i vedtaket, men eit utval er følgt opp i etterkant. Arealdelen dekkjer dagens behov ganske godt, balanserer ulike arealinteresser på ein tilfredsstillande måte og gir kommunen samla sett eit relativt stort handlingsrom.

Prioriterte planar

Helse- og omsorgsplan

Det har lenge vore eit stort behov for ein samla gjennomgang av helse- og omsorgssektoren i kommunen. Det er kome nye lovkrav mellom anna knytt til primærhelsemeldinga som påverkar mange sider av verksemda. Det ligg store moglegheiter i omsorgsteknologi som kommunen bør ta stilling til. Prinsippa frå *kunnskapsbasert praksis* (KBP) bør verta innarbeida i større delar av verksemda for å sikra kvalitet i tenestene. Mål for ein plan er ei heilskapleg organisering av tenestene

som er tilpassa årene som kjem. Folkehelseoversikt og rehabiliteringsplan skal også inn i denne planen. Planprogrammet er ferdig og sjølve planen reknar me å ha på plass ved årsskiftet 2020/2021.

Regional plan for helse og omsorg

Plan for interkommunalt samarbeid innan helse- og omsorgstenester i region Nordhordland frå 2014-2017 er utgått. Denne vil verta revidert i 2020.

Interkommunal plan for sjøareal i Region Nordhordland

Det vert starta opp ein interkommunal plan for sjøareal i Region Nordhordland. Planen skal vere godt forankra i kommunane og planutvala i kvar kommune skal vere tett involvert.

Kommunedelplan for sjøområda – oppdrett og havvindmøller

For å utnytta næringspotensialet og for å følgja opp føringar frå kommunestyret må det utarbeidast ein kommunedelplan for sjøområda som omfattar nye lokasjonar for fiskeoppdrett i sjø og botnfaste vindmøller i sjø. For å gjera dette raskt og mest mogeleg effektivt vert denne planen handsama utanom interkommunal plan for sjøareal.

Andre planar som også er aktuelle

Trafikksikringsplan

Ein oppdatert trafikksikringsplan er naudsynt for å kunne søka trafikksikringsmidlar. Vegane på Fedje er generelt smale og kronglete. Det inneber at endringar i trafikkbilete, næring og busettingsmønster fort vil kunne skapa nye utfordringar for trafikktryggleiken. Byggefeltet i Torvhaugane kan til dømes føra til at vegen til Vestkanten i større grad enn i dag vert ein skuleveg.

Pandemiplan

Det er administrativt utarbeid oppdatert pandemiplan pr februar 2020. Denne vert gjennomgått og lagt fram for formannskap og kommunestyre i andre halvår 2020.

Oppvekstplan

Barnetal i barnehage og skule har mykje å seie for korleis me organiserer desse tenestene. Folketalsutviklinga på Fedje har i eit lengre perspektiv vore negativ. Busetting av flyktningar har saman med tilflytting verka positivt. Det er vanskeleg å seie noko om framtidig utvikling, men me bør likevel leggja ein plan for korleis me skal organisera tenestene. Heilskapen er viktig. Me må sjå barnehage og skule i samanheng med folkehelse, helse, kultur, næring og trafikksikring.

Planar og utgreiingar forankra i lov, forskrift og avtale

Ruspolitisk handlingsplan

Kommunen skal ha ein rusmiddelpolitisk handlingsplan som skal rullerast kvart fjerde år, senast 30. juni året etter at nytt kommunestyre tilttrer. Arbeidet med planen er starta opp og den vert lagt fram for kommunestyret før sommaren 2020.

Heilskapleg risiko- og sårbarheitsanalyse

Gjeldande heilskapleg ROS-analyse er frå første halvår 2017. Analysen skal reviderast kvart fjerde år eller oftare viss det er vesentlege endringar i risikobiletet som tilseier revisjon. Det inneber ei rullering i 2021.

Folkehelseoversikt

Folkehelseoversikta skal ligga til grunn for arbeidet med kommunal planstrategi, og skal såleis fornyast kvart fjerde år i takt med planstrategien. Dette arbeidet vert lagt inn i Helse- og omsorgsplanen slik at dette kan vurderast i ein større samanheng.

Personalplan

Fedje kommune sin personalplan skal rullerast kvart fjerde år i midten av ein valperiode. Gjeldande plan er frå 2016, men ein del av planen vart revidert i 2019. Det er no naudsynt med ei større rullering, særleg med bakgrunn i endringar i arbeidsgjevarrolla i ny kommunelov. Planrevisjonen har starta opp og vil verte lagt fram for formannskap og kommunestyre i løpet 2020.

5. Vedlegg

Vedlegg I: Lovheimel for kommunal planstrategi

Lov om planlegging og byggesaksbehandling (plan- og bygningsloven) (2008)

§ 10-1. Kommunal planstrategi

Kommunestyret skal minst én gang i hver valgperiode, og senest innen ett år etter konstituering, utarbeide og vedta en kommunal planstrategi. Planstrategien bør omfatte en drøfting av kommunens strategiske valg knyttet til samfunnsutvikling, herunder langsiktig arealbruk, miljøutfordringer, sektorenes virksomhet og en vurdering av kommunens planbehov i valgperioden.

Kommunen skal i arbeidet med kommunal planstrategi innhente synspunkter fra statlige og regionale organer og nabokommuner. Kommunen bør også legge opp til bred medvirkning og allmenn debatt som grunnlag for behandlingen. Forslag til vedtak i kommunestyret skal gjøres offentlig minst 30 dager før kommunestyrets behandling.

Ved behandlingen skal kommunestyret ta stilling til om gjeldende kommuneplan eller deler av denne skal revideres, eller om planen skal videreføres uten endringer. Kommunestyret kan herunder ta stilling til om det er behov for å igangsette arbeid med nye arealplaner i valgperioden, eller om gjeldende planer bør revideres eller oppheves.

Utarbeiding og behandling av kommunal planstrategi kan slås sammen med og være del av oppstart av arbeidet med kommuneplanen, jf. kapittel 11